

Dr. Anthony Nicolaas ku tesina riba diskriminashon laboral

“Tin hopi deskriminashon na Boneiru”

KRALENDIJK—Resientemente abogado Anthony Nicolaas a defendé su tesina “Ervaren discriminatie op de Boneriaanse arbeidsmarkt.” Ta trata aki di un investigashon riba diskriminashon di migrantenan riba merkado laboral boneriano i efektonan ku esaki tin. Ku e tesina e abogado a promové di Meester pa Doctor.

Anthony a skohe e tópiko derechi di igualdat mirando ku den su trabou diario komo abogado e ta hopi ligá ku e tema. “Mirando Boneiru su posishon ku Hulanda, mi kier a investigá si e trahadó tin derechi riba trato igual ku e hulandes oropeo. Esei ta kosnan ku mi a bin ta boga pe for di kuminsamentu,” Anthony ta splika. Yu di Kòrsou, rubiano i hulandes ta konsiderá komo migran-



te den e tesina. “E grupo aki tambe ta eksperensia rasisimo. Kisas no mesun tantu ku por ehèmpel e latino òf haitiano”.

Tin ku trata tur hende igual segun e sirkunstansianan igual. Esaki ta e punto sentral den e abogado su investigashon.

Diskriminashon

Pa yega na informashon

konkreto pa su tesina, e mester a hasi investigashon riba e materia. E grupo di enfoke tabata hulandes oropeo, rubiano, yu di Kòrsou i boneriano.

El a investigá diskriminashon riba merkado laboral i diskriminashon na trabou. “Ta dos kos diferente. Ku merkado laboral mi ta referí kon un hende ta bai buska trabou. Si por

ehèmpel e no haña un trabou, esaki ta pa motibu di su nashonalidat òf pa otro motibu?” E otro parti ta profundisá na momentu ku e migrante haña e trabou. Ta trat’è meskos ku su otro koleganan, su salario ta meskos, e ta haña promoshon mesun lihé ku p.e. e hulandes oropeo. Mas aleu Anthony ta splika ku sorprendentemente, e hulandes oropeo tambe ta sintié diskriminá na Boneiru. Esaki tambe ta un punto ku el a trese dilanti den su buki. E hulandes oropeo no ta sintié kómodo ku e palabra makamba. Segun Anthony, esaki ta sosodé den mayoria kaso na trabou.

Debí na lapso di tempu ku e mester a entregá su tesina, Anthony no a investigá e grupo di entre otro Chines i Haitiano ku tambe ta residensia riba nos isla.

“Mi investigashon ta sientífiko i mi tabata bou di supervishon di dos profesor ku a konsehá pa mantené na 4 grupo di enfoke.

Konklushon

Finalmente Anthony ta mensioná ku el a yega na dos punto di konklushon. Tin dos teoria ora ta trata diskriminashon. Un di nan ta diskriminashon riba base étniko, i e otro ta herarkia étniko. E promé teoria ta bisa ku ta diskriminá tur migrante igual. Esaki ta enserá ku no tin distinsion di unda e persona ta bini. Sinembargo e otro teoria, ta ilustrá ku dependé di unda e migrante ta bini, e ta eksperensia ta diskriminashon òf no. E último aki segun Anthony, ta loke ta tumando lugá na Boneiru. E buki ta na biblioteca di Fuhikubo pa esnan interesá.